

MURDHA CITA

Om Awithnam astu namo siddham.

Putusing Krama Desa Adat Umahanyar, gumawe awig – awig desa pakraman, maka sepat siku – siku pangrajeg, wasti kasiddhan prayojanan mami kabeh, prasama angidep muah amanggehaken kadi tata gamaning linging awig – awig iki.

Om dirghayur astu.

SARGA I

ARAN LAN WEWIDANGAN DESA

PALET I

ARAN DESA ADAT

PAWOS I

Desa Adat punika mawasta Desa Adat UMAHANYAR

PALET II

WEWIDANGAN DESA ADAT

PAWOS 2

Wewidangan Desa Adat Umahanyar mawates nyatur desa :

- a. Sisi wetan palemahan Subak Mambal
- b. Sisi kidul Banjar Baturening
- c. Sisi kulon Tukad Ayung
- d. Sisi lor palemahan Subak Mambal

SARGA II

PAMIKUKUH, PATITIS LAN UTSAHA

PALET I

PAMIKUKUH

PAWOS 3

Desa Adat Umahanyar ngamanggehang pamikukuh :

- (1) Pancasila
- (2) Undang – undang Dasar 1945
- (3) Agama Hindu
- (4) Pasilih – asih salunglung sabhayantaka

PALET 2

PATITIS

PAWOS 4

Desa Adat Umahanyar gumanti :

(1) Ngarajegang Pancasila

(2) Mikukuh miwah ngarajegang Agama Hindu majalaran antuk astiti bhakti ring Ida Sang Hyang Widhi Wasa ;

(3) Nincapan kaweruhan karma desa, kalih ngawerdiang bhoga, upabhoga, miwah paribhoga.

(4) Ngewangun pasukertan ring pakranan, kandugi mangguhing kajagadhitan malarapan antuk pasilih asih salunglung sabhayantaka.

PALET 3

UTSAHA

PAWOS 5

Patitis ring ajeng kalaksanayang majalaran antuk Tri – Warga inggih punika Dharma, Artha muang Kama, ngupadi Kajagadhitan.

SARGA III

SUKERTAN TATA PAKRAMAN

PALET I

PAKRAMAN

PAWOS 6

Sane sinanggeh karma desa , sang sapa sire ugi polih nanggap karang desa utawi maderbe karang paumahan jangkep ring sanggah utawi merajan kemulan taksu utawi pahyangan sane sampun nganutin upakara agama,sing sinalih tunggal banjar adat utawi desa adat Umahanyar.

PAWOS 7

Sapasira ugi sane wawu mekarya karang peumahan muang sanggah kemulan taksu utawi pahyangan manut agama kengin nedunin makrama desa mewates kalih tahun saking ngaub ring rahina Nyepi tur naur batu – batu pakraman manut pararem desa utawi banjar adat.

PAWOS 8

Bacakan Krama.

(1) Krama manut pawos(6,7)kawastanin krama ngarep.

(2) Krama ngampel utawi pangele,sapa sira ugi sane wenten dedandanan waris ,saking krama ngarep ,tur magenang ring sejeroning palemahan karang Desa inucap.

(3) Krama pangele,sapa sire sane (-----)tetep ring krama ngarep wiadin megenah ring sejeroning palemahan desa.

PAWOS 9

Sapasira ugi during manut pawos (8)ring ajeng inucap,kasinanggah dunungan.

PAWOS 10

(1) Sapa sira nampi dunungan langkung ring arahina mangda masadok ring para juru.

(2) Sang sane sinanggah dunungan, jenek ring wawidangan desa adat sampun lintang ring asasih, saha sampun mederbe pangupa jiwana, patut keni dana punya manut parare.

PAWOS 11

Sapa sira krama manut pawos (8) ring ajeng inucap sane sampun mapikuren patut keni ayah lan papeson suka – duka manut pararem.

PAWOS 12

Sapa sira ugi krama desa mederbe putra utawi pianak sampun mayusa 18 warsa tingkat SMTA dados angge ayahan penyeledihi.

PAWOS 13

Krama sane balu, keni ayahan lan papeson amnt balun ipun mekadi balu luh luput ring ayahan lan papeson muani, sapunika taler sane balu muani luput ring ayahan papeson luh.

PAWOS 14

(1) Balu ngalintik utawi balu remban inggih punika sapa sira balu sane nenten mederbe ayah penyeledihi.

(2) Balu ngempu minakadi :

- a. Balu sane mederbe ayah penyade utawi panyeledihi, patut ngamedalang papeson utawi ayahan mepek,
- b. Balu sane mamitra ngalang, sujatine nenten kayogyang, (-----), kasaksiang olih Parajuru lan krama desa tur keni ayahan lan papeson mepek.

PAWOS 15

Balu remban muani ngelah pianak luh, balu remban luh ngelah pianak muani, sampun mayusa 18 warsa, keni ayahan lan papeson mepek sajawaning kanton masekolah.

PAWOS 16

Sinalih tunggal krama desa balu tua, duda tua, tan mrasidayang ngambil pakaryan, tan mederbe penyeledihi, krama punika tan keni ayahan lan papeson manut tatimbangan para juru desa.

PAWOS 17

Jadma ubuh meme – bapa luput ayahan , yan sampun mayusa 18 warsa kanton daha taruna keni ayahan lan papeson balu.

PAWOS 18

Krama sane nincapang kaweruhan utawi muatang pawilangan manut patitis awig ring pawos (4, 3) kayogyang numbas ayahan agung - alit manut pararem desa utawi banjar.

PAWOS 19

Leluputan

Sane patut luput ayah miwah papeson desa adat inggih punika :

1. Para juru desa adat manut pararem.
2. Pangku kahyangan tiga.
3. Para Sulinggih lan Pinandita.
4. Para pengurus Parisadha desa, para pakaseh manut pararem.

PAWOS 20

1. Dharmaning krama desa adat :
 - a. Ngayah ring Kahyangan Tiga
 - b. Ngayah ring desa adat
 - c. Muspa utawi mabhakti ring kahyangan tiga, sajabaning kacuntakan.
 - d. Nyanggra sahaning prabeya wewangunan lan pangacian ring desa utawi ring kahyangan tiga, miwah prabeya – prabeya sane kaperluang olih desa adat.
2. Wawenang Krama desa adat :
 - a. Polih pengayoman sekala niskala
 - b. Patut nyanggra karang desa miwah banjar, nganggen pasar desa, nganggen setra desa adat.
 - c. Maturan utawi musoa ring kahyangan tiga.

PAWOS 21

Wusan makrama

Sane mangkin wusan makrama desa utawi banjar aat minakadi :

1. Krama sane mangingsir genah kelian desa adat tur sampun sah katerima ring desa adat inucap, iriki patut kalepas antuk kelian desa adat saha ilikhita.
2. Yening wenten krama wusan magama Hindu, swadharma lan wewenang dadosn krama desa adat ical kadulurin pararem.
3. Krama sane wusan mapekraman ring desa adat Umahanyar tan polih pah – pahan arta – brana desa.
4. Sujatine nenten kayogyang nyuwudang krama makrama desa adat utawi mabanjar adat.

PALET 2

PARA JURU

PAWOS 22

Para juru desa inggih punika sang sane ngeterang desa adat.

PAWOS 23

Para juru desa wenten kalih soroh :

(1) Para juru adat miknakadi :

Kelian desa aadat utawi bendesa adat, panyarikan utawi Sekretaris, juru raksa utawi bendahara.

(2) Para juru banjar adat utawi para juru tempekan minakadi :

Kelian banjar adat utawi kelian tempekan, kelian patus punika wakil kelian banjar adat miwah kasinoman.

PAWOS 24

Para juru desa adat mawaneng limang warsa.

Pawos 25

Para jurukapilih miwah kagentosan madasar antuk pararem krama desa adat risampun para juru kaadegin patut kadulurin antuk dewa saksi ring pura bale agung kaprebeya olih krama desa adat.

PAWOS 26

Sang sane dasos kaanggehang para juru inggih punika :

Krama desa sane wikan – wijaksana utawi nganggen agama Hindu, mayusa sakirang – kirang ipun 30 warsa, sampun marabian, tur weruh ring aksara Bali utawi latin, miwah maderbe kayun ngayah utawi Satya brata.

PAWOS 27

Wusan dados para juru :

- (1) Sahantukan pinunas ipun, minakadi sangkan polih tugas saking pamarintah tur jenek doh saking desa, Taler sangkan sakit – sakitan.
- (2) Sahantukan telas waneng ngayah utawi nenten kapilih malih.
- (3) Sahantukan nilar sasana.

PAWOS 28

Pikenoh para juru desa.

- (1) Luput saking sahananing papeson manut pararem
- (2) Polih arta – Brana manut pararem.

PAWOS 29

Piteges indik palet para juru :

- (1) Kelian desa adat pinaka penua, ksanggra antuk panyarikan lan juru raksa miwah kelian banjar adat.
- (2) Swadharmaning kelian adat tawi bendesa, ngenterang saha nglaksanayang awig – awig muang pararem desa.
- (3) Ngenterang kraa rauhing warga desa sami ngupadi antuk patitis awig.
- (4) Maosang kalih niwakang pemutus arepe ring wicara kramadesa masarana antuk pawilangan awig – awig.
- (5) Maka duta desa muang baweh ring sapasira ugi.
- (6) Para juru sami sadados antuk mangda nglaksanayang asta brata.

PALET 3

KULKUL

PAWOS 30

Kulkul punika sarana desa utawi banjar maka cihna ring pasikian pakayun ritatkala suka duka.

PAWOS 31

Suaran kulkul sane karajengan mabina – binaan sakadi ring sor :

1. Kahanan bahaya geni : atulud ngambat
2. Kahanan bahaya utawi banjir : duang tulud.
3. Kahanan bahaya amuk : tigang tulud.

4. Kahanan bahaya kamalingan : atulud.
5. Bahaya sampun prasida katulungin : pawilangan parum.
6. Krama kematian : pawilangan parum utawi pawilangan makarya.
7. Wong ngalayat : atulud mimbuh tung, tung, tung.
8. Wong rare medal :

Yan lanang : tung, tung, tung.

Yan istri : tung, tung.

9. Mahayu – ayu piodalan : tung – ting ngompang.
10. Wong magebab : pawilangan suaran kulkul manut jam.

PALET 4

PARUMAN

PAWOS 32

Paruman luir ipun :

1. Paruman krama desa
2. Paruman krama banjar
3. Paruman para juru desa
4. Paruman para juru banjar

PAWOS 33

- a. Paruman krama desa sekirang – kirang ipun awarsa apisan utawi nganutin kabuatan.
- b. Paruman krama banjar nganutin kabuatan sekirang ipun nyabran asasih apisan, katetepang manut pararem.
- c. Paruman para juru nganutin kabuatan sekirang ipun nyabran asasih apisan.

PAWOS 34

Paruman kalanturan risampun karauhin panyungkem lintang ring atenga ($\frac{1}{2}$).

PAWOS 35

Panyungkem sane tan ngarauhin paparuman tur sampun mapasadok ring para juru tan kasisipan.

PAWOS 37

Sane kengin tan parum (polih puangkidan) luir ipun : sakit, matepetin sakit keluasan, kapialang kapademan, ngawentenang karya pasuka – dukaan, nanging mangda wenten sadok ring para juru.

Pawos 38

Nyabran paruman desa/ banjar patut ngamedalang canag utawi cane saha raruntutan manut urak.

PAWOS 39

Sahaning kaputusan manggeh sah, yan sampun kasungkeman gilik saguluk utawi musyawarah mufakat.

PAWOS 40

Tatepan taler kaanggehan pastikan, risampun kacamponin, kalih pah tiga saking sang rauh.

PAWOS 41

Pamiteges paruman

1. Prajuru desa madruwe kawenangan ngarincikang pidabdab usaha desa lan wenang ngamedalang tetegenang ring krama desa sadurunge kaingkupang antuk krama desa sanjawaning padjata kala.

2. Ritatkala paruman patut para juru muang krama sane parum, ngangge busana adat nyelempot saha tan kadadosang makta gagawan.
3. Genah paruman patut ring bale banjar utawi ring bale desa.
4. Paruman langkung ping tiga, taler tan ngamedalang tetapanan para juru wenang nunas bawos ring guru wisesa.
5. Tetepasan paruman maka pamiteges patut kasurat, tur kasiarang ring krama ritatkala parum punika.
6. Ritatkala paruman tan maren ngarcana ring Ida Sang Hyang Widhi Wasa makasarana Widhi Widhana, canag sari utawi cane.
7. Maka sarana jagi ngawitan parum, kalaksanayang pangastungkara majalaran penganjali.
8. Sasampun wus bebawosan patut kalaksanayang macak raris kapuputan antuk ngastiti majalaran paramasanti.
9. Tan kalugra ngawetuang suara gora utawi biuta yan prade asapunika, kasisipan manut pararem kabawos keni pacamil.

SARGA IV

SUKERTA TATA AGAMA

PALET 1

DEWA YADNYA

PAWOS 42

Pura – pura sane kamanggehang Kahyangan tiga minakadi :

Pura Desa, Pura Agung, Pura Puseh, Pura Dalem Kahyangan

PAWOS 43

Parahyangan miwah wewangunan ring kahyangan tiga, kapatutan nganutin tattwa agama tur kasanggra kaprabiyan lan kapiara olih karma desa.

PAWOS 44

Sahaning pura ring sawewengkon desa Umahanyar patut kaaci, olih sang sane nyungsung.

PAWOS 45

Sapasira keni kasebelan lan kadadosang ngranjing ring pura – pura Kahyangan tiga muang pura sane lianan.

PAWOS 46

Sane kaucap kasebelan manut pawos (45) minakadi :

- Mewarih (yening sampun mayusa 7 warsa)
- Mabacin
- Ngambahan rambut
- Menahin wastra
- Melalung
- Masanggama
- Manemah mamisuh,
- Mawiadi/ marebat
- Mabawos cemar/ wak purusia
- Misusuin anak rare

- Menek ring pelinggih, sajabaning pemangku.
- Miwah sane saosan.

PAWOS 47

Sane mamurug pawos (45) ring ajeng, kasinanggeh sisip tur mangda ngawentenang upakara guru piduka utawi tatebasan manut ring Sang Hyang Aji.

PAWOS 48

Kahyangan kahanan Durmanggala luih ipun :

- Kahyangan kasambar dening kilap, karuntuhan dening taru ageng, katibening dening rah manusa, keni ketunuan/ puun, karanjangan pandung/ maling, karanjangan wong edan, karanjangan wong sebel kandel, karanjangan wong engengan, karanjangan lulut, karanjangan buron alas, kahanan wangke manusa.

PAWOS 49

Yan wenten wong engengan maning ring sajeroning pura, sampunang kagepe, mangda kapintonin kadi bawos Sanghyang Aji. Yan tan tuhin dewa/ Widhi wenang wong engengang punika kasisipan.

PAWOS 50

Yan wenten kahyanagn kahanan sami pawos (48.49) wenang kahyangan punika kaprayascita/ kacarunin agung alit, manut ring Sanghyang Aji.

PAWOS 51

Kulkul ring pura.

Sahaning pura – pura kahyangan tiga patut wenten kulkul pinaka cihna mahayu – ayu kasucian.

PAWOS 52

Kulkul ring pura patut kasuarayang ritatkala wenten odalan, pahuman krama – krama panyungsung, ngawentenang muspa, miwah saosan manut pararem.

PAWOS 53

Rerainan – rerainan

Rerainan – rerainan sane patut kalaksanayang/ kamargiang olih karma desa, nganutin pujawali, minakadi :

1. Somaribek
2. Pagerwesi
3. Tumpek
4. Sugihan
5. Galungan
6. Kuningan
7. Saraswasti
8. Siwaratri
9. Nyepi
10. Purnama – Tilem, miwah sane siosan.

PAWOS 54

Penjor Galungan

Nyabran rerainan Galungan I karma desa adat, patut mamenjor ring lebu ring hulu pamesuannyane soang – soang.

PAWOS 55

Nyanggra Panyepian

- a. Malis kamargiang ring patirtan Gumasih, utawi ring Segara.

PAWOS 56

Rikala Melis kahenterang olih para juru desa adat sami, sawawengkon desa adat Umahanyar.

PAWOS 57

Ring Tilem Kasanga, kawentenang ngrupuk, maka cihna magpag rahina panyepian.

Upacara penyepian kalaksanayang antuk karma desa adat/ umat Hindu sami sajabag desa Umahanyar manut lontar “ SUNARI GAMA “ inggih punika :

- Amati Geni
- Amati Karya
- Amati Lelungan
- Amati Lelanguan

PAWOS 58

Pabratan panyepian kalaksanayang, saha kamargiang saking endag surya ngantos tengah wengi pk. 00.00

PAWOS 59

Sapasira manurug kecaping pawos (58) keni sisip, manut pararem.

PAWOS 60

Benjang semengan wus rahina Nyepi kabawos ngemak geni, makacihna pangawit Isaka Warsa patut soang – soang kram desa adat, sami masima karma/ dharma santi.

PALET 2

RSI YADNYA

PAWOS 61

Ring pura – pura kahyangan tiga patut kaadegang Pamangku.

PAWOS 62

Pamangku Kahyangan Tiga tan keneng Cuntaka.

PAWOS 63

Prade sinalih tunggil Pamangku Kahyangan Tiga kapialang, pangacine kengin kamargiang olih Pamangku Kahyanang Tiga sane tan keni kapialang manut sadu Pamangku ring kelian desa adat.

PAWOS 64

Ngadegang Pamangku patut nganutin dadudonan piteket kadi ring sor :

- a. Ngewilang saking turunan (utawi penyade),

- b. Nunas pawuwus Widhi
- c. Pilihan Krama desa

PAWOS 65

Pamangku patut madiksa Widhi ring kahyangan inucap, prabeya kamedalang antuk I karma ngemong.

PAWOS 66

Sane ten dados kanggen pamangku :

- a. Ceda angga luih ipun :
Peceng , sengkok, cungh, bolang, jeriji tuna, jeriji lebih, bidug, bancih
- b. Sakit illa, buduh, ayan, sakit beseh/ beteg, sakit tahunan
- c. Uning ring nyurat sastra Bali/ Latin.

PAWOS 67

Yan pet pamangku Kahyangan tiga seda, patut kasanggra antuk I karma desa tan wenang pendem patut kaabenin, indik upakara ika katanggung antuk I karma desa.

PAWOS 68

Dharmaning Pamangku

- 1. Sahaning pamangku patut nelebang daging pustaka darmaning pamangku.
- 2. Pamangku kahyangan tiga patut muput sahananing upakara kahaturang olih saluiring karma desa adat utawi karma desa soang – soang.

PAWOS 69

Pikolih pamangku kahyangan tiga :

- 1. Pangangge putih – kuning arangsukan sekirang – kirang ipun nyabran awarsa apisan.
- 2. Luput ayah kalih urunan
- 3. Polih nandu laba, utawi pituwas seosan manut pararem desa utawi banjar.

PAWOS 70

Wusan dados pamangku :

- 1. Saking pinunas dane sangkaningtan mrasidayang ngamargiang dharmaning pamangku, utawi sangkaning sakit – sakitan.
- 2. Pamangku nilar sesana amurug ring swadharmannya mangda prayascitang raga upakara manut ring sanghyang aji, prabeyanya pamangku inucap.
- 3. Yaning pet pamangku amurug sesame ngantos ping tiga wenang I karma desa nguwasang inucap.

PALET 3

PITRA YADNYA

PAWOS 71

Setra inggih punika genah mendem utawi ngeseng sawa emongan karma desa adat soang – soang sajebag desa Umahanyar, sane magama Hindu.

PAWOS 72

Rahina pamendeman utawi pangesangan sawa ring setra patut ngarsayang pamargi ring sang wikan utawi Bendesa adat.

PAWOS 73

Rahina padewasan pamendeman utawi ngeseng sawa sane tan wenang ring setra – setra sajabag desa Umahanyar sakadi ring sor :

1. Piodalan ring kahyangan tiga muah pauman kahyangan tiga.
2. Prawani, Purnama miwah Tilem
3. Rarainan jagat Saraswati, Pagerwesi, Galungan miwah Kuningan.
4. Ida Bhatara ring Kahyangan tiga kantong nyejer.

PAWOS 74

Upacara pengabenan ngelanus, kayogya mamargi manut ring lontar.

PAWOS 75

- a. Rare sane mayusa kurang ring 3 (tigang) sasih padem, patut kapendem pramangkin tan ngekangan dewasa.
- b. Yening sampun langkungan ring 3 (tigang) sasih patut abenang nglungah.
- c. Saking maketus selanturipun patut kaaben, tur ngererehpawila padewasaan.
- d. Jadma padem beling, jadma padem keni gering agung manut pararem patut kapendem pramangkin.

PAWOS 76

Sajeroning desa ritatkala jaga mendem utawi ngeseng sawa lintang ring adiri, ring rahina tur setra tunggal patut sane nampekan setra mamargi rihinan.

PAWOS 77

Sajeroning desa ritatkala wenten mendem sawa miwah ngaben ring rahina lan setra tunggal patut sane mapendem ngamargiang rihinan.

PAWOS 78

Layon sane majalaran salah pati, dados kabakta budal tur kaupakara saha kapendem utawi kaaben sepatutipun.

PAWOS 79

Layon sane majalaran ngulah pati, dados kabakta budal saha kapendem utawi kaaben nanging patut kaimbuhan upakara pangulapan ring genah seda, perempatan Jalan, muah cangkem setra tur banten – banten pangulapan inucap kasikiang ring sawanya yadiapin mapendem utawi mageseng.

PAWOS 80

Asing – asing karma desa adat, sane padem patut kaaben olih sane maderbe sawa utawi karma desa adat antuk pangeritan manut pararem desa adat.

PAWOS 81

Dunungan utawi penumpang sane magama Hindu sane wenten kulawargannyane makrama desa adat irika.

PAWOS 82

Kalaning ngamedalang sawa utawi layon mangda kadabdabang nganutin tata susila tan dados magugag utawi magarap.

PAWOS 83

Indik ngenahan sawa ring paumahan, yaning ngaben alit wenang kali wuku, ngaben madya wenang tigang wuku, ngaben agung wenang nenem (6) sasih.

PAWOS 84

Agung Alit Pengabenan, manut pawilangan upakara bebangkit.

- a. Tan mabebangkit – ngaben alit.
- b. Mabebangkit ngantos 3, ngaben madya
- c. Mabebangkit langkung ring tiga, ngaben agung.

PAWOS 85

Indik larangan ring setra :

1. Tan wenag ngincapang bangbang, ripet wenten mangda jadmata inucap ngupakara setra manut ring sanghyang aji manut pararem.
2. Rikala ngendag tan dados makta tanah setra ke desa pakraman.
3. Tan dados ngaryaning kuburan permanen antuk bata, paras beton miwah sahanan ipun.

PAWOS 86

Jadmata sewos agama tan dados mapendem ring setra umat Hindu, soang – soang desa adat sajabag Umahanyar.

PAWOS 87

Yan pet wenten karma mamurug ring daging awit palet pitra yadnya.

PALET 4

MANUSA YADNYA

PAWOS 88

Manusa yadnya inggih punika : upacara – upacara dharmaning manusa ngawit kamen benang manik sajeroning garba kalayu sekar .

Upakara – upakara inucap sekadi ring sor :

1. Magedong – gedongan
2. Mas rare
3. Pupus Udel
4. Roras rahina
5. Nutug Kambuhan
6. Nigang Sasihan (manelu bulanan)
7. Pawotonan utawi aoton bem bulanan
8. Tutug kelih utawi raja sewala, raja singa
9. Matatah utawi mapandes
10. Mawiwaha
11. Mawinten

Upacara – upacara inucap nista madya ipun manut sastra agama saha Catur Dresta.

PAWOS 89

Desa Adat Umahanyar nenten maosang indik manak salah, angalangkahi karang hulu muang asu

mundung manut peraturan daerah/ perda Bali no. X th 1951.

PALET 5

BUTHA YADNYA

PAWOS 90

Butha yadnya inggih punika upacara – upacara pabiakala ring pertiwi lan kahyangan sarwa prani saha upacara – upacara.

PAWOS 91

Upacara pabiakala ring sarwa prani luire :

1. Ring sarwa tumuwuh rikala tumpek pangatag (Saniscara Kliwon wuku Wariga).
2. Ring sarwa ingon – ingon rikala tumpek kandang (Saniscara Kliwon wuku uye)

PAWOS 92

Upacara pabiakala ring pertiwi kahyangan lan babutan kawastanin macaru utawi taur.

PAWOS 93

Pacaruan inucap ring ajeng nista, madya, utama manut wiguna kadi ring sor :

1. Eka sata
2. Panca sata
3. Panca Sanak
4. Panca Kelud
5. Resi Gana
6. Tawur Agung

PAWOS 94

SARGA VI

SUKERTA TATA PAWONGAN

PALET 1

PAWIWAHAN

PAWOS 100

Pawiwahan inggih punika : parabian wong lanang sareng wong istri sane meduluran saking keraketan kayun jaga nuju kajagadhitan ring sajeroning pakurenan anut ring ajaran agama Hindu.

PAWOS 101

Jadma sane sampun kajatiang marabian, patut madruwe surat akata perkawinan sane kamedalang antuk guru wisessa majalarang upasaksi saking bendesa adat.

PAWOS 102

Indik upakara pawiwahan patut kamargiang nganutin Catur Dresta miwah patut kasaksiang olih prajuru banjar adat soang – soang miwah Kelian desa adat.

Piteges Indik Pawiwahan :

1. Pawiwahan punika manggeh sah yan sampun ngelaksanayang :
 1. Widhi Wedhana
 2. Wenten saksi saking prajuru desa
2. Rikalaning pawiwahan, upami wenten silih tunggil tan rauh sahantukan wenten karya mabuat pisan, makadi wenten ring dura Negara, wenten ring payudan miwah sane seosan. Pawiwahan punika wenang kamargiang tur kasahang, risampun wenten ilikita utawi surat pernyataan sane janten sah sane tan rauh, kala ring natab sane tan rauh punika wenang gentosin antuk pengangge.
3. Pawiwahan kabaos tan sah yening:
 1. Natab upakara saking papaksaan
 2. Nenten wenten saksi muah ilikita
 3. Silih tunggil tan rauh tur tan wenten surat pernyataan.
4. Gamia – Gamana
Gamia gamana punika patut kelidin, riantukan ngeletehin desa adat, nanging yan patut wenten jadma punika patut mrayascita ring Sanghyang Aji.

PALET 2

PEGAT MEKURENAN

PAWOS 103

- a. Yening wenten jadma palas merabi saking pada lila patut wenten sadu saha surat pernyataan ring para juru desa utawi banjar tur mangda polih ilikita saking guru wisesa utawi pengadilan.
- b. Jadma sane sampun pecak palas makurenan pradene atep malih mangda ngawenten sadu ring kelian adat saha ngawentenang upakara manut dresta.

PALET 3

ANGKAT SENTANA

Pawos 104

Sane dados angkat kaanggehang sentana jadma lanang utawi istri sane durung marabian, saha tuwuh utawi yusan ipun alitan ring sane ngangkat tur pageh magama Hindu.

PAWOS 105

Pinih riin pangambilan patut saking purusa, yan tan wenten saking purusa wau saking pradana yaning taler tan wenten wau ngambil ring sapisira ugi.

PAWOS 106

Sentana sane manggeh pastika sesampune majaran upakara kasaksinin antuk para juru adat tur kasiarang ring krama.

PAWOS 107

Asing – asing ngangkat sentana patut kasadokan ring guru wisesa.

PALET 4

WARIS

PAWOS 108

Sane sinanggah waris, arta brana lan tategenan minakadi : arta guna kaya, pusaka, hak ngangge desa, taler utang – piutang sane wenten sadereng sida.

PAWOS 109

Waris patut katerima antuk ahli waris, risampun sane nerimang waris puput kaabenang.

PAWOS 110

Sane sinanggah ahli waris inggih punika :

Preli Sentana purusa, sentana paperasan sane pastika.

PAWOS 111

Padum waris lanang – istri pateh, yening tan wenten klesa utawi nyeburin.

PAWOS 112

Ahli waris sane tan patut nerima waris :

1. Nyentana nyeburin karang ring jadmata seosan.
2. Jadmata alpaka guru utawi nyodayang miwah misuyang pewaris tur keni hukuman pidana.